

紅袖添香室焚書

題

清
辰



紅袖添香室
焚書

PDG

紅袖添香室叢書第五集目錄

詩

十美詩

鮑皋

集美人名詩

冒辟疆

清谿惆悵集

悔菴居士

金粟閨詞百首

彭羨門

千春一恨

黃九煙

比紅兒詩註

沈可培

日本美人百詠

和久光德

悼亡百集絕句

許傳霈

明宮詞

陳嗣章

十國官詞

孟彬

儷華館吟草

高劍華

紅袖添香室叢書

詩

十美詩

鮑

平

樓上

一角南山見柳梢，玲瓏窗戶彩雲飄；夕陽紅倚誰家袖？明月高吹昨夜簫。遠道思君重極目，臨街笑客半藏腰。游春年少顛狂甚，遺却珊瑚白馬驕。

燈下

雙烟已換博山香，正對金荷治晚粧；擷脚翠低雲弄影，臉波紅映粉生光。風簾未下寒暄婢，刀剪方閒倦呢郎；手剔蘭煤教仔細，好留半燄解羅裳。

牆頭

空鎖樓臺不鎖春，粉垣青荔縮紅巾；東家蝴蝶攀花女，環院鞦韆過路人。一笑恰逢粧半面，千金難得畫全身！王昌宋玉春腸斷，可奈兒家住比鄰！

舟中

芙蓉滿坐兩頭花，綵竿江東唱越娃；纔學凌波旋渡水，那堪傾國更浮家？飛來畫槳雙鸂玉，過去風鬟八扇紗；知在橫塘南岸住，慣呼艇子載琵琶。

馬上

隔袖和裙絕可憐，桃花叱撥錦連錢！紅粧一面來當路，碧玉雙蹄莫上天。生恐胭脂粘汗血，行愁鬢髻墜珠鈿；到門郎主歡迎出，欲下迴腰取次妍。

簾內

非花非霧不分明，八尺湘波與地平；裙衩風聞低見影，欽梁燕墮悄聞聲。曲多宛轉勞心記，人在中間早目成；十里揚州高卷處，回頭一笑兩無情！

池上

鏡檻紅渠面面霞，背臨清水掠盤雅；步虛倒影渾身月，寫照方空沒骨花。草共春心生夢裏，萍隨蕩子去天涯；沿隄恐被鴛鴦見，却藉樓陰一半遮。

花間

織錦窗前百舌啼，芳閨桃李自成谿；繁枝亞髻驚香重，淺草侵裙妬綠齊。比妾容顏憐對笑，如歡氣息憶雙攜；前生原是輕身燕，落絮游絲惹卽迷！

月下

只照嬋娟莫照愁，坐常如水一庭秋；乍疑黃色眉端見，渾覺清光臉際流。白苧衣裳霜複疊，水晶簾幌玉雕鏤；空堦夜久涼侵機，挾瑟徘徊更上樓。

林下

絕代幽居空谷間，侍兒日暮賣珠還；風前柳絮詩沾雪，月上梅花夢繞山。奇服新裁差穩稱，眞眉不學自彎環；佳期千里烟波闊，望遠傷春易損顏。

集美人名詩序

唐人比紅兒詩百章，以一美人而形之以百美人也。想紅兒，因想見似紅兒者；辟疆無所想，卽見美人于千載一堂上，爲詩歌，被之絲竹肉，無不可。美人中有遇者，有未遇者；有忌者，有无忌者；見辟疆而皆屈膝，快知遇，道萬福；辟疆胡以邀寵于美人哉？辟疆再廣美人詩，爲美人侑，美人各報以瑤草瑤芝，或貽以當年含情未逗之思，蓋爲美人洗出百千年面目，覺髯眉人噴珠瀉魄，不及美人冰綃一痕，香澤至今。辟疆得此，非倖也！予里廿四橋頭，生美人最著，金陵王氣已盡，邗江四碧，結爲粉黛之鄉，尙

不逮苧蘿村一西子，足令千古無顏色。予居相近，恨不得爲見知，然而無有乎爾，則亦無有乎爾，甯獨西方美人一輩爲然哉？社弟包壯行題

集美人名詩

如皋冒 泉辟疆者

廣陵明月夜，蕩舟二十四橋之間，聞玉簫聲何處？小倦方眠，忽得浣紗江上木蘭橈之句，二美人寓焉，亟起續成，集爲廿絕，得美人名百有奇。敢曰多情，殊慚唐突！但良夜畫船，幽人清夢，實未能負此一時也。偶然付梓，名附於後。

一

浣紗江上木蘭橈，輕拂蓮花動細腰；那得輕鴻倩妙女？鶯鶯燕燕共逍遙。

浣紗 木蘭 蓮花 細腰 輕鴻 妙女 鶯鶯 燕燕 逍遙

二

舊桃星壓柳枝眉，小小金蓮阿軟宜；更有堪憐憐盼盼，盈盈秋水月華披！

舊桃 柳枝 小小 金蓮 阿軟 憐憐 盼盼 盈盈 秋水 月華

三

清風明月映春卮，合德妖嬈孰亞兒；何日清娛歡子夜，酥香斜抱碧蘭枝。

清風 明月 春卮 合德 妖嬈 亞兒 清娛 子夜 酥香 碧蘭 蘭枝

四

荆玉無瑕琬琰稀，妙容如玉媚春暉；宜男欲佩金萱草，何必頻頻喚浣衣？

荆玉 無瑕 琬琰 妙容 如玉 春暉 宜男 金萱 頻頻 浣衣

五

絳仙弄玉在蓬萊，妙淨玄機雙鳳來；欲駕彩鸞尋玉女，非烟非霧是陽台！

絳仙 弄玉 蓬萊 妙淨 玄機 雙鳳 彩鸞 玉女 非烟 非霧 陽台

六

雪兒爲貌玉兒身，軟弱蘭香逼太真；況是亭亭方嫋嫋，蕙柔何日共迎春？

雪兒 玉兒 弱蘭 蘭香 太真 亭亭 嫋嫋 蕙柔 迎春

七

微眠幽夢等虛舟，忽渡清波到遠洲；六六峯頭春草翠，心心只愛愛溫柔！

微眠 幽夢 虛洲 清波 遠舟 六六 春草 心心 愛愛

寒梅新杏發新香，惹恨含愁益斷腸；夜夜碧雲清照我，雲容倩女在何方？

寒梅 新杏 新香 惹恨 含愁 斷腸 夜夜 碧雲 清照 雲容 倩女

九

玉環敲斷水晶紋，金鳳銜來上彩雲；製作玉簫吹月素，素娥逸韻比湘君。

玉環 水晶 金鳳 彩雲 簫湘 月素 素素 素娥 逸韻 玉君

十

紫雲絳樹裊煙長，絡秀飛瓊淡淡粧；卻要夜來同醉月，今宵巧笑玉奴旁。

紫雲 絳樹 裊煙 絡秀 飛瓊 淡淡 卻要 夜來 醉月 巧笑 玉奴

十一

輕紅拂面麗春知，夜妹朝姝魂欲癡；貯以金珠真寵寵，白雲英裏寫幽姿。

輕紅 紅拂 麗春 夜妹 朝姝 金珠 寵寵 白雲 雲英 幽姿

十二

青童綉佛思深深，兩意三香悔昔心；立志堅堅欺白雪，青楊紫竹禮觀音。

青童 綉佛 深深 兩意 三香 堅堅 白雪 青楊 紫竹 觀音

十三

素秋銀燭理瑤箏，葉桂荂華吐月英；莫愁滿願無雙日，紅葉傳詩錦瑟橫。

素秋 銀燭 瑤箏 葉桂 茗華 月英 莫愁 滿願 無雙 紅葉 錦瑟

十四

江柳青青芍藥紅，流鶯巧囀弄翔風；芳春百媚珠簾捲，結佩流蘇密約通。

江柳 青青 芍藥 流鶯 巧囀 翔風 芳春 百媚 珠簾 結佩 流蘇 密約

十五

寒月清琴操已殘，延娛琴客久乘鸞；相思欲寄梅花蕊，踏雪兒郎奈興闌！

寒月 清琴 琴操 延娛 琴客 乘鸞 相思 梅花 花蕊 踏雪 雪兒

十六

麗玉娟娟妬玉英，嬌紅紅艷艷生情；蘊秀更饒洪度韻，愛卿窈窕復才卿。

麗玉 玉娟 娟娟 玉英 嬌紅 紅紅 艷艷 蘊秀 洪度 愛卿 窈窕 才卿

十七

思士飛仙擁麗容，綠珠滴滴睡芙蓉；羅羅敷體靈芸噴，杜若蘭閨卿與儂！

思士 飛仙 麗容 綠珠 滴滴 芙蓉 羅羅 羅敷 靈芸 杜若 蘭閨

十八

文婉芸香香玉梅，眉言眼語筆耕來；巧心織出怡雲曲，何意娘行佳麗才！

文婉 芸香 香香 玉梅 眉言 眼語 筆耕 巧心 心織 怡雲 何意娘 佳麗

十九

絳紅綃製采春衣，紫玉生香翡翠霏；月滴花嬌渾不似，如姬最好世應稀。

絳紅 紅綃 采春 紫玉 生香 翡翠 月滴 花嬌 如姬 最好

二十

寶樹櫻桃賽紫霞，柳絲颺色採芹芽；山山游盡愁春去，暮雨朝雲解語花。

寶樹 櫻桃 紫霞 柳絲 採芹 山山 愁春 暮雨 朝雲 解語花

清谿惆悵集自序

集唐用黃屠堂駢文句

湔裙水上，拾翠巖邊，有美一人，亭亭獨處，產耶溪而濯質，弄藥爭花，索皓月而按歌，調絲擲管。叢臺妙伎，本是無雙；天水僊哥，素推第一。糝初梅而委色，伴穠李以表年，始預風流，自然飄蕩。妍妝炫服，降於巫峽之陽；雪膚花顏，藐然姑射之上。則有長卿消渴，始詣臨邛，餞斜光於碧岫之前，選麗質於綺羅之列。經過款洽，幸無折齒之慚；朝夕窺臨，多值斂眉之日。春山歷歷，暮雨沉沉，命妖侶於石城，留姓名於金谷。

時則金釭二等，猶隔瑣窗；牙管一雙，新調鉛粉；寫瓊毫而洞色，巧借丹青；把芳酒以留歡，會諸絲

竹能書善畫，豈吟執扇之詩？曲楊溫爐，自奪鴛衾之價。香風乍度，斜領全開；攬明鏡於懷中，墜纖腰於掌上，含情愈惑，不邀結而自親，握手將違，尙殷勤而未已。

既而暖風習習，蘭圃多暄，瑤草萋萋，長亭欲別，公子去而忘返，王孫遊兮不歸，夢佳期於北方，贈靈脩於南浦。浣紗見影，尙悄悄以在眸；挑錦停功，亦僂僂而度日。惜流光之不駐，絃管相催；歎懽會之難尋，琴棋間作。斜窗印月，誰憐此夜之情？彩檻臨風，已極傷春之目。辭紅樓之婉婉，落絮飄花；登綺席以逶迤，丹鷲紫蝶。

爾迺遇河間之姹女，駭汾水之佳人，託芙蓉以爲媒，指蘭渚而可掇。金鋪月墜，已無爲雨之期；錦席夜陳，復認吹簫之侶。雲縈綠鬢，競飾明璫；花豔丹唇，來窺皎鏡；引臂替枕，楚襄之夢宜然；斜身引幃，洛水之靈非匹。花有情而獨笑，月未仄而先陰；衾被罔留，膏鉛不御。形單影隻，同銷地媼之魂；目斷意迷，自有湘妃之泣。

於是繞霞廊而轉步，彈雲璈而答歌；暫疑王母之台，近接天孫之館。漲鵲橋之遠岸，動影南樞；扈駕砌之仙遊，陪歡北渚。方日霓裳鳳髻，雲帔花冠，一襲輕衣，九莖仙草；雙珠絕價，疑佩響於風餘；四照靈葩，洗鏡光於月夜。

詎料重扃駐燠，長廡生寒；間涼暄則芳樹無情，觀媚麗則瑤房有寂。誓山海而長在，良會不恆；與珠玉而俱灰，五情空熱。長煙冉冉，愛羅幌之春風；餘馥葳蕤，漱玉池之靈液。泛素波而徑去，不覺魂銷。

翦瑤帶而猶欹，初疑夢覺。

嗟乎！芬芳九醞，荏苒百齡；逮花落而春歸，竟月同而地隔。猶憶瑤台吐鏡，銀燭掩花，綃縠參差，綺羅迴薄；捧金鑪而入侍，蘭麝氛氲，抗璇闥而同嬉，管絃嘔啞。仙凡阻越，去也何緣？非夢寐而不通，舊予懷其誰語？雖復圓瑤月聚，佩以幽襟，頰髻雲垂，題於團扇，亦何能使華牋五幅，頓華屨以自持，瓊樹一枝，伴瓊槭而不去也哉？

僕文非綺組，學乏縑緗；時閱瑤籤，常持縹帙。思齊宋玉，庶幾申騷客之情；猶賦陳思，彷彿入神仙之境。精靈忽悅，乃爲撫掌之資；夢想徒勞，僉得捧心之態。緣情不忍，與影俱遊；脩蛾再覩，無忘歡好之時。匣鏡重窺，更佇丹青之玩。一盼一睇，一肌一容，靡弗長短侔形，穠纖合度；顧我則笑，忽欲去而中留。望之若仙，似將翔而復倚；瓊台易接，是耶非耶？然而斷章摘句，尋恥雕蟲；散藻摘華，希聲刻鵠；淫文豔韻，劣近於謳歌；麗質冶容，尙慚於風雅。藏之幽房密寢，殊不類其爲人；刻乎貞金翠珉，豈敢傳諸作者？有歡有戚，且歎且言；髣髴煙光，依稀仙躅。倩徐陵作序，終傳鄭國之香；爲逸少裝書，真謂羽陵之蠹。歲在元默，敦牂如月朔日，悔靈居士纂於三十六天長雨花室。

梅庵銀河吹笙圖序

銀河吹笙圖者，梅庵追悼鏡娘之所作也。瑤瑟停弄，湘天空而雁唳；瓊簫罷吹，秦月冷而鳳咽。樹

色秋曉，鵲飛何年？樓頭夜明，蟾挂今夕。鏡脈脈而無影，獨幢幢而不暉；合歡之房已蕪，珊瑚之幄何黯。穀薄於霧，寒襯五銖之衣；裾輕若霞，瘦銷一把之玉。樹碧疑恨，委叢花於曲廊；牆紅界愁，交凍蘚於文甃。梧桐半死，宿露猶翻；楊柳長眠，清霜未歇。蜀客魂斷，聽三更之杜鵑；緱仙夢歸，愴千載之遼鶴。傷心之事，誰能遣乎？

溯夫絳館校籍，羣推懿真；黃庭鈔經，獨授妙想。鶴扇曾障，逢洪崖而拍肩；鸛冠忽欹，渡弱水而攜手。閨寂琳宇，空虛碧城；莓苔院局，薛荔帷卷。玉殿思悄，說幽盟於往年；瑤台氣清，憶舊夢於隔世。方謂丹餐絳雪，屑餌元霜；青鳥時窺，翠鸞晚跨。月中搗藥，或呼蟾來；雲外傳書，多附鶴使。

豈知閨苑之謫先返，玉峯之期遽行；翳桂旗於西山，飛芝蓋於南浦。望凌波之轍，洛女原神；懷明月之璫，江妃忽逝。顧乃仙劫雖歷，夙緣未忘；待阮郎而不歸，攜蕭史而纔去。九分駐景，願從碧落之遊；錄受觀香，請列紫清之侍。事會多阻，音塵竟湮；條脫之金尙纏，參差之玉空叫。羯鼓聲促，驚羽化而袂飄；叢鈴語悽，泣香銷而旛護。桃碧千樹，人間斷腸；梨紅一枝，天上彈淚。何必錦瑟破夢，方吟悼亡之詩；玉簫逾期，始製傷逝之賦？嗟乎！三生絮泊，半晌梁炊；石火之光條銷，曇花之影偶現。霜零青女，妝闥嬋娟；星隔黃姑，路悲迢遞。天茫茫而結恨，地鬱鬱而埋愁；魀輪不停，煙轡長往。銀甲爪冷，擘麝幾時；繡轡肩低，駕鹿何處？展是圖也，不猶可想像飛鳥，追尋鑒簪，駐驚鴻於卷中，招別鵠於琴裏。團扇在握，慨秋風之棄捐；佩環空歸，傳夜月之悵望也哉？

然而渚宮雲散夢未覺於楚襄；吳市煙沈情徒傷夫韓重。慚無雅奏，變哀蟬之聲！竊有寓言，參化蝶之譚。夫清淺碧海，看揚塵以幾回；寂寥青天，悔奔月以終古。靈藥難覓，劫灰易飛；水閱千齡，雲浮一映。即使香案舊吏，電鑰早持；珠宮清班，霓裳高詠。而劉綱仙眷，豈瓊肌之不彫？曼倩細君，將綠髮之終稿。今且名並刻玉，像同模金；自寫明妃之圖，爭題幼婦之句。雖復釵上雙鳳，頸緣誰迴；匣中一鸞，影怯獨舞。檻曲胃網，晶屏寒而夜開；牀空棲塵，玉冷簾而宵竟。未免祇益淒哽，倍銷別魂；屢響恨其來遲，簾旌愁其隔斷。至乃臉際餘暈，眉間薄顰；曉山歛妝，秋水呈媚。固已霞氣瑩抱，追姝子於羅浮；雪光映膚，遇神人於姑射。何況喬雲涌現，如昇銀台；翠水迴環，似接瑤島。仙帔風曳，步虛之聲宛聞；畫裙煙飄，冲舉之勢恍覩。攬蕙帶而徐結，搴荃香而試紉；聽擲管於三霄，贈支機於七夕。或者星辰如昨，鍼樓許邀；日月更長，壺嶠容住。磨鏡市上，隨負局之翁；彈箏庭中，逐吹笙之伴。則金榜重闢，琅函再開；宮居廣寒，界近兜率。榆青鵲渡，盼乘槎於張騫；桂白兔圓，期淬斧於吳質。豈但絹裁一匹，圖標松谿？還當券署十華，簡題藥闕。

光緒壬午花生日錢塘黃祖戴才伯甫敍於駝沙廨舍之浣塵小榭

清谿惆悵集題辭

清谿曲

武進屠庚公積

妾家住清谿，楊柳垂大堤。堤邊有明月，夜夜聞烏啼。喚郎採蓮去，秀淥嬌羅綺。花底一尺天，暗香催夢起。妾心比蓮子，願託夫容裏。夫容飄秋江，蓮子墜秋水。鴛鴦不雙飛，泛蕩谿東西。風波弱淺葉，晝船人未歸。昔年歌舞衣，零落知幾時。谿頭舊門卷，芳草空萋迷。

惆悵曲

武建劉心寶墨伯

惆悵復惆悵，憶昔清谿上。谿水碧於油，美人樓上頭。樓頭月如鏡，樓外花交映。花底結同心，鴛鴦春睡深。卷簾睡初足，窈窕明雙玉。春酒醉流霞，斑駁留妾家。斑駁還惜別，寂寞清谿月。清谿月有情，妾心谿月明。春歸花事晚，嫁與東風管。東風條已闌，太息花枝殘。梧桐抱秋影，院落依金井。金井落華涼，轆轤淒斷腸。涼天碧雲杳，消息傳青鳥。惆悵谿邊樓，烏啼夜夜愁。

銀河吹笙圖題詞

長相思 韻用詞牌名

黃承湛

長相思，酷相思，鎮日腸迴十二時。沈沈玉漏遲。醉春風，怨春風，零落天桃一萼紅。香銷憐箇儂。鏡中人，洞天春，影隔湘簾玉燭新。巫山一片雲。月當窗，惜雙雙，藕色衫薰四和香。欄凭八寶裝。夢揚州，少年遊，悵望仙人百尺樓。銀河桂殿秋。一叢花，惜秋華，解唱當筵穩護砂。虹橋西笛家。繫裙腰，帶人嬌，月底修成百字謠。慵吹碧玉簫。夢橫塘，意難忘，眉樣輕顰西子妝。圖留百媚娘。

浣谿紗散餘霞；佳約同看陌上花。湖堤蘇幕遮！踏青遊，過秦樓，教譜霓裳四換頭。鞋杯金鳳鈎！
憶仙姿，恨來遲；管領東風第一枝。玉腰蝴蝶兒！醉花陰，兩同心，珍惜韶光一寸金。文鴛戀繡衾！
賀新郎，滿庭芳，湘月無言上海棠。猩屏圍暗香。剔銀燈，訴衷情，人在瑤台第一層。仙桃醉太平！
鳳棲梧，宴清都，分得梅妃一斛珠。春風瑞鷓鴣！玉樓春，夢行雲，懶掠低鬟結帶巾。櫻桃點絳脣！
瑣窗寒，惜餘歡，斜背蘭缸解佩環。神仙離別難！繡停鍼，戀情深，夢繞羅浮翠羽吟。蝶裙重疊金！
柳梢青，喜遷鶯，風笛聲低望遠行。離亭駐馬聽！鷓鴣天，醉垂鞭，南浦春帆下水船。幾時人月圓！
武陵春，採芳新，綠浸谿頭冉冉雲。桃源憶故人！占春芳，賸垂楊，妒煞流鶯情久長。紅腔字字雙！
惜分飛，溼羅衣，寄語清谿楊柳枝。休教烏夜啼！菱荷香，買陂塘，蟋蟀聲中豆葉黃。新秋玉簫涼！
阮郎誤，歸佳期，摺疊箱中金縷衣。亭皋霜葉飛！鵲橋仙，喜團圓，並蒂纔開隔浦蓮。偏孤鏡裏鸞！
燕歸梁，倦尋芳，蘇小墳邊柳色黃。泥銜秋藥香！採明珠，葬西湖，花犯玲瓏唱念奴。誰家紅袖扶！
玉京謠，憶多嬌，何日雙攜紫玉簫。飛昇透碧霄！蕊珠間，喜朝天，想見瑤台聚八僊。雲低菩薩蠻！
月華清，桂花明，風遞瑤笙引駕行。驂鸞憶帝京。玉欄干，玉連環，定許金仙棒露盤。嫦娥相見歡！

金縷曲

王以雋

帶水銀河隔，恨秋來填橋鵲散，竟無消息。只恐黃姑難再渡，蟾影半規似缺。但小立闌干左側，金井寒螢悽泣露；更梧桐院落烏啼急。問此夜，是何夕？
嶠山枉說吹笙客，歎神仙一般飄泊。瑤京同謫料

得銀屏人未睡，長守清秋孤寂，空悵望天青海碧！襟上零星餘淚點，伴海棠慘暈猩紅色；看寶鏡，上花蝕。

千古傷懷抱，問人間元都觀裏，絳桃多少？侍女遙傳仙馭下，縷縷彩雲旋繞，比昔日龐兒瘦小。依舊含顰眉葉翦，捧鸞笙不譜相思調；偏一霎，夢魂覺！瓜皮艇子清谿櫂，憶當年翩鴻顧影，菱花同照。惆悵采鸞仙去後，今歲春歸更早。早一架茶蘼開了！天上應知還惜別，盼瑤台可許乘風到；鵲血盡，碧空杳！

菩薩蠻

吳寶鈞

芒芒恨事從頭述，風流又累才人筆；委婉訴分離，怨春空詠題！綺懷拋未了，字字相思稿；幾度憶鸞笙，幾重扇碧城。

變成只有雲英比，何期小謫紅塵底？好夢鏡中人，鏡湖西子顰。爺娘悲早故，零落還誰顧？門巷隱枇杷，酒紅鐙下花！

湘蘭早紉同心結，無端月傍粧樓別；春去惜芳菲，柳棉吹隔堤。吳儂多墜夢，不爲流波送；又惹絮沾泥，燕鶯同一啼！

江南離緒辜芳草，杏花已嫁愁難了！拾橡不療飢，病寒無可醫；相逢徒惜別，留客音塵絕；蝴蝶紙灰風，野墳青一叢！